

KANTONALNA  
PRIVREDNA  
KOMORA TUZLA,  
BROJ 7/8  
JULI/AVGUST  
2015. GODINE



# KOMORSKI INFORMATOR



AMBASADORICA  
CLAIRE BODONYI POS-  
JETILA TUZLU I TK



USVOJEN ZAKON O  
RADU



RADNI SASTANAK  
7 PREMIJERA SA  
PODRUČJA FBiH

Međunarodni  
ekološki 2015  
sajam EKOBIS

PROMOCIJA SAJMA  
„EKOBIS 2015“

**BH RAZMJENA U PRVOM POLUGODIŠTU  
DRASTIČAN PAD IZVOZA I UVOZA NAFTNIH DERIVATA**

**KANTONALNA  
PRIVREDNA  
KOMORA TUZLA**

**Izdavački savjet:**

1. Nedret Kikanović, predsjednik
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić, član

**Redakcijski kolegij:**

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

**Izdavač:**

Kantonalna privredna komora Tuzla

**Gl i odgovorni urednik:**

Dino Kalesić, dipl. žurnalista

**Tehnička priprema:**

Jovan Dobrosavljev

**Adresa:**

Trg slobode bb  
e-mail: komora@kpkt.ba  
http://www.kpktz.ba

U prvoj polovini 2015. godine bosanskohercegovački izvoz zabilježio je rast od 4,4 posto u odnosu na isti period prethodne godine, dok je uvoz u istom periodu rastao po stopi od 0,1 posto, podaci su Agencije za statistiku BiH. Izvoz BiH je u prvih šest mjeseci 2015. dostigao ukupnu vrijednost od 4,381 milijarde KM, dok je uvoz iznosio 7,639 mlrd KM. Vanjskotrgovinski deficit izaustavio se na 3,258 milijarde KM, dok je pokrivenost uvoza izvozom narasla na 57,4 posto. Rastu izvoza u prvom polugodištu 2015. najviše su doprinijeli izvoz mašina i transportnih sredstava sa povećanjem od 6,6 posto u odnosu na isti period prošle godine na ukupno 655,0 miliona KM. Izvoz proizvoda svrstanih po materijalu (koža, proizvodi od kože, papir, karton, željezo i čelik, obojeni metali, proizvodi od metala, itd) porastao je za 5,9 odsto dostigavši ukupan iznos od 1,093 mlrd KM. I dok u ovom području izvoz željeza i čelika bilježi rast od 3,3, posto, uzlet je doživio izvoz obojenih metala sa povećanjem od 9,1 posto. Raznih gotovih proizvoda (montažne zgrade, namještaj i dijelovi, odjeća, obuća itd) izvezli smo u ukupnoj vrijednosti od 1,196 mlrd KM uz rast od 4,2 posto. Prvo polugodište obilježeno je padom izvoza mineralnih gortiva i maziva od 14,1 posto, pri čemu je izvoz kamenog uglja, koksa i briketa rastao po stopi od 44 posto, ali je uteg predstavljao izvoz nafte i naftnih derivata sa padom od čak 53,4 posto. U prvom polugodištu 2015. BiH je izvezla nafte i naftnih derivata za 72,1 mil. KM, za razliku od 156,5 miliona KM u istom periodu lani. Pad vrijednosti izvoza naftnih derivata svakako treba povezati sa manjom cijenom nafte na svjetskom tržištu u odnosu na isti period prethodne godine.



Izvoz električne energije bilježi blago povećanje od 1,7 posto na ukupno 171,5 miliona KM. Visok rast izvoza ostvaren je u hemijskoj industriji 12,2 posto dostigavši ukupnu vrijednost od 297,2 mil. KM. Prehrambena industrija BiH je ostvarila u prvom polugodištu 2015. pozitivne pomake. Izvoz hrane i živih životinja sa ukupnom vrijednošću od 249,7 mil. KM, veći je za 23,1 posto u odnosu na isti period

2014. godine. U svijetle tačke ubrajaju se meso i mesni proizvodi sa izvozom većim za 90,0 posto (ukupno 33,2 mil. KM), kao i žitarice i proizvodi od žitarica sa rastom od 35,4 posto. Povećan je i izvoz povrća i voća za 16,4 posto. Na drugoj strani, nastavljen je trend pada izvoza u području pića i duhana za 0,8 posto, ali dok izvoz pića bilježi pad od 2,1 posto, izvoz duhana je povećan za 2,8 posto. Rastu ukupnog uvoza najviše je doprinio uvoz prehrambenih proizvoda od 5,7 posto na 1,03 milijarde KM, hemijskih proizvoda od 5,4 posto na 1,02 mlrd. KM, proizvoda svrstanih po materijalu za 5,0 posto na 1,73 mlrd. KM, mašina i transportnih sredstava za 4,0% na ukupno 1,58 mlrd KM, te raznih gotovih proizvoda od 4,9 posto na 744,7 mil. KM. Ipak, rezultati u nabrojanim područjima anulirani su padom uvoza mineralnih goriva i maziva za čak 21,5 posto, a koji je ukupno iznosio 1,04 mlrd. KM. Pri tome, uvoz nafte i naftnih derivata manji je za čak 30,3 posto iznosivši "svega" 709,7 mil. KM. Kao i u slučaju izvoza, razloge treba tražiti u padu cijena nafte na svjetskom tržištu.

**Top 5 zemalja glavnih vanjskotrgovinskih partnera (u milionima KM)**

| <i>Izvoz</i> |       | <i>Uvoz</i> |       |
|--------------|-------|-------------|-------|
| Njemačka     | 690,0 | Njemačka    | 922,9 |
| Italija      | 607,0 | Italija     | 865,7 |
| Hrvatska     | 452,0 | Srbija      | 804,0 |
| Srbija       | 397,9 | Hrvatska    | 782,2 |
| Austrija     | 366,7 | Kina        | 545,7 |

**IZVOZ MESA U TURSKU POVEĆAN ZA 74 ODSTO**

Izvoz mesa i mesnih prerađevina iz BiH u prvih pet mjeseci ove godine skočio je za čak 74,1 odsto u odnosu na isti period prošle godine, podaci su Agencije za statistiku BiH. Razlog za povećanje je izvoza govedeg mesa, kobasica i sličnih proizvoda u Tursku, zahvaljujući odluci vlasti Turske o bescarinskom uvozu 15.000 tona mesa i mesnih prerađevina iz BiH. Agencija za statistiku BiH saopštila je da je vrijednost izvezenog mesa i mesnih prerađevina u prvih pet mjeseci ove godine iznosila 41,9 miliona, dok je u istom prošlogodišnjem periodu iznosila 24,1 milion KM. Većina mesa u Tursku izvezena je sa Aerodroma Banjaluka, a na prevozu saraduju kompanije "Sky Airchartering" i "MNG Airlines". Iz Banjaluke sedmično u prosjeku budu organizovana četiri leta, a kapacitet aviona je 45 tona. Avion dolijeće iz Istanbula i nakon utovara mesa, koji traje oko sat vremena, polijeće nazad za Istanbul. Meso na banjalučki aerodrom stiže iz nekoliko mesnih industrija, gdje se siječe i pakuje, a po dolasku na aerodrom smješta se u skladište sa hladnjačom. Prema riječima Ertemela ovo je jedini aerodrom u BiH koji ima hladnjaču. Hasan Tasus, komercijalni direktor "MNG Airlines", je objasnio da je u pitanju vrlo osjetljiv posao jer se radi o svježem mesu, koje mora biti u hladnjači od početka do kraja transporta. Naglasio je da je "MNG Airlines" jedna od najvećih kargo kompanija u Turskoj, te da se nadaju da će nastaviti i ojačati saradnju.

D.K.

Ministarstvo obrazovanja, nauke, kulture i sporta na osnovu Člana 19. tačka 13. stav 2. Zakona o porezu na promet proizvoda i usluga ("Sl. novine Federacije Bosne i Hercegovine", broj: 6/95 i 25/97), rješavajući o zahtjevu Kantonalne privredne komore Tuzla broj: 10/15-4481/99. od 30.04.1999. godine, dalo je mišljenje o oslobađanju poreza na promet glasila "Komorski informator".

## SADRŽAJ:

|   |   |           |
|---|---|-----------|
|    | <b>AMBASADORICA CLAIRE BODONYI POSJETILA TUZLU I TK</b>             | <b>4</b>  |
|    | <b>IZ UDRUŽENJA ZA TRGOVINU, UGOSTITELJSTVO I TURIZAM</b>           | <b>5</b>  |
|    | <b>PREZENTACIJA U KOMORI</b>  | <b>6</b>  |
|    | <b>IZ UDRUŽENJA ZA PROMET I KOMUNIKACIJE</b>                        | <b>7</b>  |
|    | <b>IZ UDRUŽENJA ZA POLJOPRIVREDE U PREHRAMBENU INDUSTRIJU</b>       | <b>8</b>  |
|   | <b>USVOJEN ZAKON O RADU</b>   | <b>9</b>  |
|  | <b>NOVOSTI IZ DRUŠTVA "OMEGA" ŽIVINICE</b>                          | <b>10</b> |
|  | <b>IZGRADNJA TERMoeLEKTRANA NA PODRUČJU TUZLANSKOG KANTONA</b>      | <b>12</b> |
|  | <b>DITA RADI PUNOM PAROM, OBOREN REKORD</b>                         | <b>13</b> |
|  | <b>POZITIVNI PRIMJERI: "HERCEG" SREBRENIK I "EM - ONIX" LUKAVAC</b> | <b>14</b> |
|  | <b>IZ VLADE TUZLANSKOG KANTONA</b>                                  | <b>15</b> |
|  | <b>RADNI SASTANAK 7 PREMIJERA SA PODRUČJA FBIH</b>                  | <b>16</b> |
|  | <b>SAJMOVI U BIHAĆU I ZAJEČARU</b>                                  | <b>19</b> |



Posjeta Ambasadorice Francuske...

## AMBASADORICA CLAIRE BODONYI POSJETILA TUZLU I TK

- Prijem za Claire Bodonyi Ambasadoricu Francuske u BiH u Kantonalnoj privrednoj komori Tuzla – Posjeta “Pivari” dd Tuzla – Sastanak sa premijerom Gutićem i gradonačelnikom Imamovićem -



Ambasadorica Francuske u Bosni i Hercegovini Claire Bodonyi u okviru radne posjete Tuzlanskom kantonu, posjetila je i Kantonalnu privrednu komoru Tuzla. Nakon susreta sa Begom Gutićem premijerom Kantona, predstavnicima Ministarstva za obrazovanje, nauku, kulturu i sport TK te sa Jasminom Imamovićem gradonačelnikom Tuzle, upriličen je sastanak u Komori kako bi se ambasadorica upozнала o stanju u privredi na području Tuzlanskog kantona. “Cilj posjete Kantonalnoj privrednoj komori Tuzla je da pronađemo mogućnost za operativnu ekonomsku i privrednu saradnju Francuske i Tuzlanskog kantona” izjavila je medijima ambasadorica Bodonyi. Istakla je kako je cilj posjete upoznavnje sa velikim privrednim područjima koja omogućavaju uspostavljanje suradnje s francuskim preduzećima u okviru prenosa iskustava, vještina ili uspostavljanju partnerstva, te je najavila da će u narednom periodu ponovo posjetiti Tuzlu i TK. Esad Arnautović, dopredsjednik Kantonalnu privrednu komoru Tuzla, je za ovu priliku organizovao posjetu ambasadorice “Pivari”

dd Tuzla kako bi se razmotrile i Ambasadi Francuske ponudile mogućnosti saradnja sa Tuzlanskom pivarom. U toku razgovora u Komori, otvoreno je još niz mogućnosti saradnje u raznim sferama sa brojim privrednim subjektima sa područja Tuzlanskog kantona. Predložio dopredsjednik Arnautović i da se razmotri potencijalna saradnja koja bi mogla biti uspostavljena, ukoliko se ukaže potreba Francuske, i sa fabrikom Koksno-hemijski kombinat, u okviru koje je i fabrika đubriva, a čija je kompletna oprema za proizvodnju zamišljena na francuskom sistemu. Nakon sastanka u Komori, Ambasadorica Francuske u Bosni i Hercegovini Claire Bodonyi je u pratnji Esada Arnautovića dopredsjednika Kantonalne privredne komore Tuzla, posjetila “Pivaru” dd Tuzla i razgovarala sa direktorom Fahrudinom Salihovićem.

### Francuska ambasadorica u posjeti Tuzlanskom kantonu

U okviru posjete Tuzlanskom kantonu ambasadorica Republike Francuske u Bosni i Hercegovini Nj.E. Claire Bodonyi susrela se sa premijerom Tuzlanskog kantona Begom Gutićem. Premijer Gutić, ministrica razvoja i poduzetništva TK Mirela Đaković i ministar prostornog uređenja i zaštite okolice TK Hasan Fehratović su prezentirali Tuzlanski kanton, ekonomske pokazatelje, energetske potencijale i komparativne prednosti ovog područja, te aktivnosti koje je Vlada Tuzlanskog kantona imala u fokusu svog djelovanja u prva četiri mjeseca od imenovanja. “Vlada je svoje aktivnosti usmjerila ka održanju finansijske likvidnosti i postupnom rješavanju nagomilanih problema u privrednom sektoru, prije svega u privrednim društvima sa većinskim državnim kapitalom” rekao je premijer Gutić i dodao da se s tim u vezi već vide određeni pozitivni pomaci. Također je bilo govora o postojećoj privrednoj saradnji Bosne i Hercegovine i Republike Francuske i potencijalima u pravcu kojih bi se ta saradnja dalje mogla širiti. Implementacija Zakona o javno – privatnom partnerstvu, kao i projekti energetske efikasnosti kreiraju veliki prostor za saradnju privrednika iz Francuske sa, kako privatnim, tako i javnim sektorom na području našeg kantona, istaknuto je.



### Francuska ambasadorica posjetila gradonačelnika Jasmina Imamovića

Gradonačelnik Tuzle, Jasmin Imamović, sa saradnicima se u zgradi Gradske uprave Tuzle, sastao sa ambasadoricom Francuske u BiH, Nj. E. Claire Bodonyi. Gradonačelnik Imamović je istakao zadovoljstvo saradnjom u protekom razdoblju, posebno na ekonomskom, razvojnom i kulturnom polju, te obostranom željom da se ta saradnja nastavi i proširi. “Nama trebaju prijatelji, kvalitetni razvojni, ekonomski i projekti kulture koji mogu da povežu građane i kako bi ostvarili što bolju međunarodnu saradnju. Jako nam je važno, da jedna tako velika sila kao Francuska, bude uz nas, jer od takvih odnosa zavise sudbina i budućnost

BiH i želja nam je da gajimo dobre odnose. Povezanost Tuzle sa francuskim gradom Saint Denis je primjer takve saradnje, koja ima ogroman značaj za sve građane i potrebno je pronaći modele da intenziviramo saradnju jer postoje neograničene mogućnosti u okviru razvoja turizma”, istakao je nakon sastanka gradonačelnik Imamović. Ambasadorica Bodonyi je istakla da je ovo tek prvi sastanak, a da će ih u narednom periodu biti još. “Potrebno je da pronađemo zajedničke mogućnosti u pronalazjenju rješenja za realizaciju projekata. Tuzla je sredina koja posjeduje mnogo potencijala i na dobar način ih koristi”, istakla je ambasadorica Bodonyi.

D.K.



*Iz Udruženja za trgovinu, ugostiteljstvo i turizam...*

## INICIRANA KVALITETNIJA SARADNJA SA ZAVODOM ZA ZAPOŠLJAVANJE TK

*- Održane dvije sjednice Odbora Udruženja u proširenom sastavu – Pokrenuta inicijativa za uspostavljanje partnerskog odnosa između JU „Služba za zapošljavanje Tuzlanskog kantona“ i Odbora Udruženja za trgovinu, ugostiteljstvo i turizam Kantonalne privredne komore – Rasprava o Nacrtu Zakona o Turističkoj zajednici Tuzlanskog kantona -*



Odbor Udruženja za trgovinu, ugostiteljstvo i turizam Kantonalne privredne komore Tuzla u kratkom periodu je imao dva zasjedanja, oba u proširenom sastavu. Na prvom je pokrenuta inicijativa za uspostavljanje partnerskog odnosa između JU „Služba za zapošljavanje Tuzlanskog kantona“ i Odbora Udruženja za trgovinu, ugostiteljstvo i turizam Kantonalne privredne komore Tuzla. Tema drugog sastanka bio je Nacrt Zakona o Turističkoj zajednici Tuzlanskog kantona. “Na sjednici Odbora za trgovinu, ugostiteljstvo i turizam smo predložili značaj kvalitetnije saradnje našeg Udruženja i Zavoda za zapošljavanje. Iz ove institucije su podržali inicijativu koju je pokrenuo Odbor za trgovinu, ugostiteljstvo i turizam Kantonalne privredne komore Tuzla, a cilj je da se uspostavi što bolja međusobna saradnja, kako bi u budućnosti zajedno rješavali poteškoće i probleme sa kojima su privrednici upoznali predstavnike JU „Zavoda za zapošljavanje TK-a”.

Prevažodno je cilj da JU Zavod za zapošljavanje TK-a dostavi pravovremeno informacije privrednim društvima koje iskazuju potrebu za zapošljavanjem osoba koje se vode kao nezaposlene kod Zavoda za zapošljavanje. Takođe jedan od prioriteta u radu Zavoda za zapošljavanje je analiza aktivnih kandidata koji traže zaposlenje u odnosu na one osobe koje se fiktivno vode na Zavodu za zapošljavanje i tako ostvaruju prava koje im Zavod za zapošljavanje pruža”, rekao je Kasim Selimović predsjednik Odbora Udruženja za trgovinu, ugostiteljstvo i turizam Kantonalne privredne komore Tuzla. Kako je istakao, predstavnici JU „Zavoda za zapošljavanje Tuzlanskog kantona“ su također izrazili interes i želju da posreduju u rješavanju naplate zaostalih obaveza prema privrednim društvima, a što se odnosi na sredstva po osnovu projekata za podsticaj pri zapošljavanju – dugovanja od strane Federalnog zavoda za zapošljavanje. “JU „Služba za zapošljavanje Tuzlanskog kantona“ prihvatila je inicijativu za uspostavljanje partnerskog odnosa sa ovim Udruženjem. Cilj partnerskog odnosa je da JU „Zavod za zapošljavanje TK“ bude servis privredi, da rad Zavoda bude efikasniji i transparentniji i da podaci u buduću budu pristupačni svim privrednim subjektima. Takođe, Zavod predviđa saradnju i sa drugim udruženjima Kantonalne privredne komore Tuzla”, izjavio je Senad Muhamedbegović direktor JU „Služba za zapošljavanje TK“.



Kada je u pitanju Nacrt Zakona o Turističkoj zajednici Tuzlanskog kantona u raspravi je istaknuto da sve firme članice Udruženja treba da se uključe u raspravu o Nacrtu Zakona o Turističkoj zajednici Tuzlanskog kantona i da istaknu sve svoje primjedbe i prijedloge. To je i učinjeno, objedinjeni su svi prijedlozi za unaprjeđenje ponuđenog Nacrta, uobličeno je i dostavljeno u Ministarstvo za trgovinu, turizam i saobraćaj Tuzlanskog kantona. “

D.K.

Prezentacija u Komori...


### “THYSSEN SCHACHTBAU GMBH”

- Upoznavanje privrednika Tuzlanskog kantona sa proizvodnim programom – Postoje realne mogućnosti za saradnju – Rudnik soli Tušanj pri kraju realizacije Ugovora sa renomiranom njemačkom firmom -



Kantonalna privredna komora Tuzla u saradnji sa Thyssen Schachtbau GMBH, organizovala je u Komori prezentaciju “THYSSEN SCHACHTBAU GMBH”. Cilj prezentacije je upoznavanje privrednika Tuzlanskog kantona sa proizvodnim programom ove firme i iznalaženje mogućnosti uzajamne saradnje. “Sa aspekta razvoja Tuzlanskog kantona postoje realne mogućnosti za saradnju, posebno ako se ima u vidu da je ovo područje interesantno kao područje bogato prirodnim resursima. Znamo da ako se želi gazdovati tim bogatstvima, postoji Zakon o koncesijama koji je donesen 2002. godine i u okviru kojeg postoji Zakon na nivou Tuzlanskog kantona. Dakle, postoji mogućnost da se u okviru Zakona a na osnovu tih prirodnih bogatstava pokušaju privući poslovni partneri. Ovo je upravo predstavljanje firme interesantne sa aspekta

strateškog partnera”, istakao je Esad Arnautović dopredsjednik Kantonalne privredne komore Tuzla. Sektor „Oknogradnja i bušenje“ firme Thyssen Schachtbau GMBH je bitan dio kompanije i pripada vodećim preduzećima iz ove oblasti sa ukupno izgrađenih 200 km okana i u Evropi je najveća firma specijalizovana za bušotine i gradnju okana. Pored gradnje okana konvencionalnom tehnikom, primjenom moderne bušneće opreme i miniranja, primjenjuju i tehnike cementiranja, zamrzavanja kao i potpuno mehanizovano bušenje sa promjerom od preko 8,0 m. Pored navedenog, vrše radove u rudnicima koji se koriste za skladištenje radioaktivnog otpada, rudnicima kamenog uglja, potašte i soli. Posljednjih godina je sektor „Oknogradnja i bušenje“ znatno i dosljedno poboljšao sigurnost na radu, te je 2010. i 2011. godine završilo sa oznakom za udese na radu broj 3. Time je tendencija zadnjih godina nastavljena i postignut je visok nivo sigurnosti na radu. Sektor je certifikovan prema DIN EN ISO 9001. Svi ovi podaci veoma su važni za Rudnik soli Tušanj u Tuzli.



“Kada je u pitanju saradnja sa ovom firmom, za nas su sve ove karakteristike od velikog značaja. Mi smo prošle godine potpisali Ugovor o saradnji sa ovom renomiranom njemačkom firmom. Ugovor se odnosi na četiri istražno-eksploatacione bušotine i jednu bušotinu gdje smo predvidjeli sanacione radove i sve aktivnosti predviđene ovim Ugovorom su završene. Značajna je ova saradnja za nastavak naših aktivnosti na eksploataciji ležišta kamene soli Tetima koje se obavljaju pojedinačnim bušotinama sa površine terena i to je ukupno 24. koju bušimo od ukupno 101 projektovane. Očekujemo saradnju i u narednom periodu u kojem nas očekuju novi zadaci, nove bušotine a za šta ćemo na vrijeme pripremiti tendere, vjerovatno u septembru ili oktobru ove godine”, rekao je Amir Sušić, direktor Rudnika soli Tušanj u Tuzli.

D.K.





Iz Udruženja za promet i komunikacije...

## ODBIJEN PRIJEDLOG KANTONALNE UPRAVE ZA INSPEKCIJSKE POSLOVE

- Održana sjednica Odbora Sekcije za unutrašnji promet putnika -



Članovi Odbora Sekcije za unutrašnji promet putnika koja djeluje u Kantonalnoj privrednoj komori Tuzla pri Udruženju za promet i komunikacije, održali su redovnu sjednicu u proširenom sazivu. I ovoga puta su sjednici prisustvovali predstavnici Ministarstva za trgovinu, turizam i saobraćaj Tuzlanskog kantona te Kantonalne uprave za inspekcijske poslove. Razmatrana je problematika vezana za pružanje staničnih usluga na Autobuskoj stanici „Zapad“ Bukinje i „Istok“ Simin Han. Bajro Halilčević, predsjednik Odbora Sekcije sve prisutne je upoznao o tome šta je po ovom pitanju urađeno u prethodnom periodu, koji su zauzeti stavovi zauzeti i šta je od svega dogovorenoga realizovano. Nenad Lukanović predstavnik Ministarstva trgovine, turizma i saobraćaja istakao je da je u ime Ministarstva koje predstavlja, upućen dopis Ministarstvu prometa i komunikacija Federacije Bosne i Hercegovine u kojem se predlaže način na koji bi riješili nastale probleme.

Podsjetimo, prijedlog je da se brišu sporne autobuske stanice iz redova vožnje, što bi omogućilo nesmetan rad svih prijevoznika.

### Obrazloženje

Inicijativa za vanredno usklađivanje redova vožnje proizašlo je iz toga što se vrši pritisak na sve prijevoznike da koriste stanične usluge na Autobuskoj stanici „Zapad“ Bukinje, koja nema nikakve funkcije, jer ni jedan putnik nema potrebu da izađe ili uđe u autobus na toj stanici. Takođe, napominjemo da je izmještanjem autobuske stanice „Kajmak“ došlo do promjene itinerera za sve prijevoznike, tako da su prijevoznici sa Zapada završavali po itinereru na autobuskoj stanici Simin Han, a prijevoznici sa Istoka završavali na improvizovanoj autobuskoj stanici Zapad Bukinje. Pojedini prijevoznici koji nisu upisali autobusku stanicu Zapad u svoje redove vožnje nisu mogli isti ovjeriti, već im je nadležno ministarstvo vratilo redove vožnje na doradu, odnosno na upis autobuske stanice „Zapad“ i tek tad im je izvršena ovjera redova vožnje. Isti problem se javlja i sa prijevoznicima autobuske stanice „Istok“ Simin Han. Takođe, izmještanjem autobuske stanice iz grada i davanje saglasnosti novih redova vožnje napravljeno je više grešaka, odnosno pojavila se i Međugradska autobuska stanica, pa po ovome prijevoznici bi morali ulaziti u četiri autobuske stanice, što bi dovelo do promjene prolaznih vremena, ulazak jednih drugih u polaske i na kraju bi se stvorio haos u saobraćaju. Zbog toga tražimo da se prijevoznicima omogući korištenje izbora autobuske stanice koja je prihvatljiva za svakog prijevoznika. Traži se od Ministarstva prometa i komunikacija Vlade Federacije Bosne i Hercegovine da izvrši provjeru kategorizacije stanice „Zapad“ Bukinje, Tuzla. Ulazak u navedenu stanicu je otežan zbog izuzetno malog radijusa krivine na skretanju sa javne ceste, odnosno izlazak iz autobusne stanice nije moguć bez prelaska preko pune linije koja razdvaja kolovoz na po dvije saobraćajne trake za različite smjerove kretanja vozila. Takođe, ova autobuska stanica nema ni horizontalnu ni vertikalnu signalizaciju.

Nakon diskusije predloženi zaključak od strane Kantonalne uprave za inspekcijske poslove da svaka firma razgovara sa firmom Gradskog i prigradskog saobraćaja nije prihvaćen od strane članova Odbora Sekcije. Članovi Odbora Sekcije donijeli su zaključak da sve firme koje se bave unutrašnjim prometom putnika upute hitan zahtjev Ministarstvu trgovine, turizma i saobraćaja za brisanje autobuske stanice iz redova vožnje i pokretanje usklađivanja redova vožnje 2015/2016 godine. Na ovom sastanku je aktueliziran problem sa naplatom dugovanja od Rudnika „Kreka“ Tuzla. Članovi Odbora Sekcije donijeli su odluku da se uz pomoć Ministarstva trgovine, turizma i saobraćaja Tuzlanskog kantona inicira sastanak sa generalnim direktorom Rudnika „Kreka“, kako bi se iznašla mogućnost naplate potraživanja firmi.

D.K.



Iz Udruženja za poljoprivredu i prehrambenu industriju...

## POLJOPRIVREDNICI NEZADOVOLJNI ODNOSOM VLADE TK

- Poljoprivrednici imaju minimalne poticaje i to otežava njihov opstanak-



Udruženje za poljoprivredu i prehrambenu industriju Kantonalne privredne komore Tuzla raspravljalo je na sjednici o izradi prijedloga programa novčanih podrški u poljoprivredi i ruralnom razvoju u 2015. godini. Sastanku je prisustvovao i ministar za poljoprivredu, šumarstvo i vodu TK Abdulah Zukić, kako bi se detaljnije upoznao sa zahtjevima poljoprivrednika. Sastanak je upriličen kako bi se uključili predsjednici svih grupacija i udruženja u određivanju programa podsticaja za poljoprivredu za 2015. na području TK. "Nedavno je usvojen federalni program. Vladu TK nije briga za poljoprivrednike, izrazito smo nezadovoljni odnosom Vlade TK prema poljoprivrednicima. Smatramo da Vlada ne poštuje odluku kojom je predviđeno

da se za potrebe poljoprivrede izdvaja 3.5 posto od poreskih primanja u budžetu. Poljoprivrednici imaju minimalne poticaje i samim time to otežava njihov opstanak", kazao je medijima Senad Hećimović predsjednik Odbora Udruženja za poljoprivredu i prehrambenu industriju Kantonalne privredne komore Tuzla. Zanimljivo je da je ovakav sastanak inicirao upravo resorni kantonalni ministar, kako bi iz prve ruke dobio informacije o, s jedne strane potrebama poljoprivrede a s druge strane i o aktuelnoj situaciji privrede na području Tuzlanskog kantona. Upitno je koliko će se moći prihvatiti i realizovati od upućenih prijedloga, a bilo ih je dovoljno za napraviti skriptu koja bi od velike koristi bila studentima poljoprivrednih fakulteta. Tek, činjenica je, a ministar je dobio potvrde upravo iz prve ruke, poljoprivreda Tuzlanskog kantona je u nikad težoj situaciji i mnogi poljoprivrednici najavljuju "ključu bravu". "Ukupna izdvajanja Vlade Tuzlanskog kantona za poljoprivredu su oko tri miliona konvertibilnih maraka. To nije niti jedan odsto od onih famoznih 3,5% pa s pravom smatramo da je to što Vlada naziva podsticajem u konkretnom slučaju predstavlja samo dio koji se može nazvati socijalom", ističe Hećimović i dodaje da se ne očekuje niti od najava rebalansa Budžeta niti od ovog sastanka da donesu boljitak poljoprivredi i poljoprivrednicima Tuzlanskog kantona.

"Mi ozbiljno razmišljamo da se odrekemo i ovoga što oni nazivaju podsticajem a što nas vrijeđa i što je u nivou socijalnih davanja. Neka Vlada taj iznos podijeli socijalnim slučajevima a i nismo socijalna kategorija. Mi smo oni koji treba da budu sastavni dio razvojnih projekata. Želimo da razvijam proizvodnju a danas smo u situaciji da nemamo ni sekundarne sirovine u poljoprivrednoj proizvodnji, uvozimo ih iz susjednih država što dovoljno govori u kakvom je stanju naša poljoprivreda", rekao je Senad Hećimović. Koliko se ozbiljno pristupa ovom problemu, govori podatak da se već dobrim dijelom zakoračilo u drugu polovinu



godine a još se prikupljaju prijedlozi za izradu Programa novčanih podrški u poljoprivredi za 2015. godinu...

D.K.



Vanredna sjednica Doma naroda Parlamenta FBiH...

## USVOJEN ZAKON O RADU

*- Zakon je usvojen sa 28 glasova za i tri protiv - Najliberalniji zakon o radu u Evropi – Bez zakona nema zapošljavanja i nema pristupnih fondova -*



Dom naroda Parlamenta FBiH usvojio je na vanrednoj sjednici Zakon o radu koji je posljednjih sedmica izazvao velike polemike u Federaciji. Zakon je usvojen sa 28 glasova za i tri protiv, a ranije su sa sjednice izašli delegati Naše stranke, SDP-a, SBB-a i Demokratske fronte. U izlaganju prije glasanja o Prijedlogu zakona o radu, premijer Federacije BiH Fadil Novalić je rekao da je ovo najliberalniji zakon o radu u Evropi, te da nam je liberalizam ponuđen kao nagrada. "Ako ne bude usvojen zakon onda nema zapošljavanja i nema pristupnih fondova", kazao je on. Novalić je kazao kako su nam pristupni fondovi potrebni kako bi se usnjerili za

zapošljavanje i razvoj zemlje. Ne usvajanje dovesti će samo da daljeg nastavka prakse postojanja privilegovanih koji žive na račun građana FBiH. "Zakon nam treba zbog nas, ne zbog EU", kazao je Novalić. Safudin Čengić, predsjednik Udruženja poslodavaca u FBiH, je rekao da su pregovori o zakonu o radu počeli u maju ove godine nakon sastanka s federalnim ministrom rada Milanom Mandilovićem. "Tada nam je pružena prilika, kao i sindikatu da napravimo kompromis i da će to Vlada prihvatiti", istakao je Čengić. Dok je trajala sjednica Doma naroda, ispred zgrade Parlamenta Federacije Bosne i Hercegovine protestovalo je nekoliko hiljada ljudi. Demonstranti su u popodnevnim satima uspjeli proći kroz zaštitnu ogradu oko zgrade, u pokušaju da uđu i prekinu sjednicu Doma naroda. U tome ih je sprečavao veliki broj policijskih službenika. Delegati Doma naroda, njih 31, zgradu Parlamenta FBiH napustili su kroz pomoćni izlaz. Delegati SDP-a, SBB-a i DF-a napustili su vanredno zasjedanje Doma naroda nakon što je većinom glasova odlučeno da Vladin prijedlog zakona o radu FBiH ostane na dnevnom redu. "Ne želimo učestvovati u ovom cirkusu. Ovdje su prekršena sva pravila i procedure", istakao je za fenu delegat SDP-a Aner Žuljević. Delegatkinja DF-a Draženka Subašić istakla je kako je "Zakon o radu FBiH mimo svih procedura stavljen na dnevni red". I delegati iz SBB-a naglasili su kako su se zbog stavljanja na dnevni red vanredne sjednice Doma naroda Parlamenta FBiH prijedloga zakona o radu FBiH "mimo poslovnčkih odredbi odlučili napustiti zasjedanje". Oni su odlučili da se također pridruže građanima ispred zgrade Parlamenta FBiH, izvještavali su sa ove sjednice brojni medij i u BiH.



**Kikanović:**

### **Novi Zakon o radu je dobar i treba privredi**

Predsjednik Kantonalne privredne komore Tuzla Nedret Kikanović u izjavi Feni ocijenio je da je novi Zakon o radu dobar i da bi trebao unaprijediti razvoj privrede, a samim time i cjelokupnog društva. Naglasio je da ekonomsko-socijalni partneri trebaju voditi dijalog oko onoga, oko čega se ne slažu i da iznađu rješenja. Kikanović smatra da Zakon o radu treba što prije usvojiti i na taj način omogućiti privredi daljnji razvoj i otvaranje novih radnih mjesta.

D.K.



Novosti iz Društva "Omega" Živinice...

## OTVOREN BEKO SHOP BRČKO



U Brčkom je na adresi ul. Reisa Čauševića br.68, Tc Konzum otvoren se ekskluzivni „Beko shop“. Kompletan prostor Beko shopa je ureden po novom Beko konceptu gdje se sav asortiman izlaže u segmentima i po novom konceptu brendiranja Beko, sa novim logom Beko. Beko shop se prostire na površini od 200 m<sup>2</sup> prodajnog prostora. Beko shop otvara firma Omega d.o.o., koja je ekskluzivni zastupnik brendova Beko, Grundig i Blomberg za BiH. Ovo je 22-i Beko shop u Bosni i Hercegovini, prvi u Brčkom. Društvo Omega trenutno pripada grupi deset najvećih trgovačkih kuća u državi i vodeća je firma na tržištu bijele tehnike i elektronike sa preko 50% tržišnog učešća. Omega ima preko 300 domaćih kupaca bijele tehnike, elektronike, i preko 2000 kupaca za robe široke potrošnje širom Bosne i Hercegovine. Beko je prisutan putem firme Omega d.o.o. na BiH tržištu već 15 godina i do sada su ostvareni izuzetno dobri poslovni rezultati. Budući da je u Evropi jedan od top dva branda po tržišnom udjelu za bijelu tehniku, Beko je lider na tržištu frižidera,

zamrzivača, mašina za veš i samostojećih štednjaka. Beko shop je trgovina bijele tehnike, elektronike BEKO, BLOMBERG i GRUNDIG te malih kućanskih aparata. U ponudi se može naći veliki asortiman BEKO samostojeće tehnike – veš mašine, mašine za suđe, sušilice, frižideri, zamrzivači, el.štednjaci, ugradna tehnika, led, plazma i klasični televizori, klima uređaji, audio/video tehnika, mali kućanski aparati i slično. U ponudi ima preko 1000 različitih proizvoda. Pouzdanost, kvalitet u izradi, energetske učinkovitosti i velike vrijednosti, samo su neki od razloga koji su sve više i više presudni kod odabira Beko kućanskih aparata. Beko svake dvije godine na tržište lansira novitete. Beko je međunarodni brand kućanskih uređaja koji pripada Arcelik grupaciji. Budući da je u Evropi jedan od top tri branda po tržišnom udjelu za bijelu tehniku, Beko je lider na tržištu frižidera, zamrzivača, mašina za suđe, mašina za veš i samostojećih štednjaka u Velikoj Britaniji. Beko se trenutno prodaje u preko 100 država a Beko proizvodi se koriste u milionima domaćinstava širom svijeta. Beko je dobitnik nekoliko međunarodnih nagrada za kvalitet, inovativan dizajn, pouzdanost i za zelenu tehnologiju. Beko proizvodi su preporučeni od vodećih potrošačkih magazina na Evropskom tržištu, zahvaljujući svojoj velikoj energetskej učinkovitosti i visokim performansama,



što je uzrokovalo da budu dio "Best Buy" kategorije proizvoda. Svi Beko proizvodi zadovoljavaju uslove o očuvanju životne sredine i proizvedeni su u skladu sa ISO 4001 standardom. Od ukupnog prihoda cijele firme 60% Omega ostvaruje kroz vlastitu maloprodajnu mrežu a 40% prodaje ostvaruje se kroz veleprodajnu mrežu sa preko 3000 kupaca koja je razvijena po cijeloj Bosni i Hercegovini. Kompanija Omega je od 2003 godine počela s razvojem vlastite servisne mreže koja servisira sve vrste robe koja Omega prodaje. Omegina servisna mreža je danas najjača servisna mreža u BiH, sa preko 50 ovlaštenih servisa u BiH. Omegina servisna mreža je organizovana tako da ima Centralni servisni centar sa CALL CENTROM za prijavu kvarova koji svakodnevno komunicira sa vlastitim Omeginim servisima u Sarajevu, Mostaru, Doboju i Tuzli i sa još preko 50 ovlaštenih servisa pod ugovorom koji se nalaze u svim gradovima BiH. Beko je dobitnik nekoliko međunarodnih nagrada za kvalitet, inovativan dizajn, pouzdanost i za zelenu tehnologiju kao što su: Energy Saving Trust, Stiftung Warentest (StiWa), Plus X, iF Design i Red Dot Design nagrade. Beko proizvodi su preporučeni od vodećih potrošačkih magazina na Evropskom tržištu, zahvaljujući svojoj velikoj energetskej učinkovitosti i visokim performansama, što je uzrokovalo da budu dio "Best Buy" kategorije proizvoda.



U 2011, kao rezultat ATLETE (Appliance Testing for Energy Label Evaluation), projekat proveden od strane CECED (European Committee of Domestic Equipment Manufactureres) zajedno sa komisijom EU, Beko postaje jedan od rijetkih brandova koji su certificirani kao nositelj potpuno tačnih informacija u kategoriji Evropskog načina utroška energije. Beko proizvodi su preporučeni od strane vodećih potrošačkih magazina na Evropskom tržištu zahvaljujući svom visokom energetskej učinku i visokim performansama. Osim Beko proizvoda u Beko shopu se mogu naći i GRUNDIG proizvodi koji su svakako svima već dobro poznati, a polako se ovaj brand ponovo vraća i u našu zemlju sa sve većom ponudom televizora i elektronike. Na dan svečanog otvaranja Beko shopa Brčko za prvih 50 kupaca pripremljeni su vrijedni pokloni kao i gotovinski popust za sve kupce od 5 % na kompletan asortiman.

Dobro došli u novi Beko shop, saopćeno je iz Marketing službe Omege...

D.K.

Privredne vijesti...

**MENPROM DOGOVORIO PLASMAN PROIZVODA NA TURSKO TRŽIŠTE**

Mesna industrija Menprom Tuzla dogovorila je plasman proizvoda iz svog programa na tursko tržište putem razgranate mreže firme Yayla Turk, saopćila je Privredna/Gospodarska komora Federacije BiH. Sastanak predstavnika mesne industrije Menprom i turske firme Yayla Turk održan je u organizaciji Privredne/Gospodarske komore Federacije BiH nakon iskazanog interesovanja turskih partnera za uspostavljanje poslovne saradnje sa Menpromom. Gosti su obišli proizvodne pogone, gdje su se uvjerali u visok tehnološki nivo proizvodnje na kojem Mesna industrija Menprom, uz široku paletu zdravih, ukusnih proizvoda proizvedenih posebnom pažnjom i po jedinstvenim recepturama, temelji svoju poslovnu filozofiju. Dosljednost u provođenju politika kontinuiranog kvaliteta, potvrđenim u visokozahtjevnim certifikatima HACCP i HALAL kvalitete, vrhunske mesne delikatese od visokokvalitetnog pilećeg, goveđeg i purećeg mesa, mesnu industriju Menprom čine jednom od vodećih mesnih industrija u našoj zemlji. Yayla Turk na turskom tržištu prepoznatljiva je po visokokvalitetnim mesnim preradevinama čiji kvalitet je garantiran Halala certifikatom.

Širbegović je potpisao ugovor o gradnji proizvodno – skladišnog objekta površine cca 9000 m<sup>2</sup>. Britanska Grupacija RPC donijela je odluku o izgradnji novog objekta u vidu proširenja postojeće fabrike u Gračanici. "Veoma nam je drago da su predstavnici Investitora ukazali povjerenje našoj kompaniji. Posebno nam je važno da je Investitor jako zadovoljan kvalitetom, rokom i cijenom. Za ovaj objekat smo uradili projektovanje, a početak proizvodnje i radovi na montaži armirano-betonske konstrukcije su planirani početkom mjeseca augusta 2015.", izjavili su za akta.ba u Širbegoviću. Poslovni uspjesi Širbegovića se temelje isključivo na kvalitetnom i brzom izvođenju radova s maksimalnim poštovanjem ugovornih obaveza. "Kvalitetnaših proizvođa iz zadovoljstva naših kupaca ostajenašestalno opredjeljenje kao najbolja garancija za uspješno poslovanje", zaključuju u Širbegoviću.

**ŠIRBEGOVIĆ GRADI PROIZVODNO-SKLADIŠNI OBJEKAT ZA RPC SUPERFOS BALKAN**

Širbegović je potpisao ugovor o gradnji proizvodno – skladišnog objekta površine cca 9000 m<sup>2</sup>. Britanska Grupacija RPC donijela je odluku o izgradnji novog objekta u vidu proširenja postojeće fabrike u Gračanici. "Veoma nam je drago da su predstavnici Investitora ukazali povjerenje našoj kompaniji. Posebno nam je važno da je Investitor jako zadovoljan kvalitetom, rokom i cijenom. Za ovaj objekat smo uradili projektovanje, a početak proizvodnje i radovi na montaži armirano-betonske konstrukcije su planirani početkom mjeseca augusta 2015.", izjavili su za akta.ba u Širbegoviću. Poslovni uspjesi Širbegovića se temelje isključivo na kvalitetnom i brzom izvođenju radova s maksimalnim poštovanjem ugovornih obaveza. "Kvalitetnaših proizvođa iz zadovoljstva naših kupaca ostajenašestalno opredjeljenje kao najbolja garancija za uspješno poslovanje", zaključuju u Širbegoviću.

**FIRMA Š.F. INŽINJERING IZ TUZLE ĆE GRADITI REZERVOAR VITKOVIĆI U GORAŽDU**

Ugovor o ustupanju radova na izgradnji rezervoara "Vitkovići", kojim će biti omogućeno snabdijevanje vodom Industrijske zone i naselja Vitkovići su zaključili vlasnik firme "Š.F. Inženjering" d.o.o Tuzla Fikret Šahmanović i načelnik Općine Goražde Muhamed Ramović, navodi se na internet stranici Općine Goražde. Vrijednost ugovorenih radova iznosi 160.944 KM koje će snositi izvođač, dok će Općina plaćanje izvršiti nakon primopredaje izvedenih radova. Ugovorom je precizirano da radovi budu završeni u roku od 60 dana. Prema riječima načelnika Ramovića, Općina Goražde planira u tri faze napraviti rezervoare i novi vodovod za industrijsku zonu Vitkovići. "Svjesni smo koliko nam je potreban ovaj projekat upravo zbog svih privrednih subjekata koji se nalaze na području MZ Vitkovići. Prva faza iz ugovora odnosi se na prvi rezervoar gdje ćemo izvršiti priključak vode sa glavnog gradskog napajanja iz Vitkovića, kao i napajanja koje će ići iz pravca Mravinjca, tačnije vodovoda 'Starac'. Zatim imamo i drugu fazu, drugi rezervoar, a naravno nakon toga dolazi treća, odnosno završna faza gdje ćemo imati potisne uređaje za vodovod", pojasnio je Ramović. Dodao je da je Općina Goražde uložila 6.000 KM u idejni projekat i nadzor. Fikret Šahmanović izjavio je da i po okončanju ovog projekta, očekuje nastavak saradnje firme "Š.F. Inženjering" i Općine Goražde. "Ovo je jedan u nizu projekata koje je ova firma izvela do sada uspješno, a ja se nadam da ćemo i ovaj Projekat na opšte zadovoljstvo samim završetkom radova uspješno okončati. Na osnovu dosadašnjeg iskustva nismo imali problema kada su u pitanju imovinsko-prvni odnosi u općini Goražde, pa se nadam da ćemo to i ovaj put izbjeći", kazao je Šahmanović. Predsjednik mjesne zajednice Vitkovići Dževad Bekrija naveo je da se zapravo radi sedmoj fazi radova na proširenju kapaciteta vodovoda „Starac“, piše akta.ba. "Postojeći rezervoar značajno je niži od potreba stanovnika MZ Vitkovići. Izgradnjom novog rezervoara, koji se diže na kotu visočiji od 70 metara u odnosu na postojeći, doći ćemo u situaciju da će se snabdjevati 30 do 40 domaćinstava koja trenutno nemaju apsolutno nikakvo vodosnabdijevanje", objasnio je Bekrija.

no završna faza gdje ćemo imati potisne uređaje za vodovod", pojasnio je Ramović. Dodao je da je Općina Goražde uložila 6.000 KM u idejni projekat i nadzor. Fikret Šahmanović izjavio je da i po okončanju ovog projekta, očekuje nastavak saradnje firme "Š.F. Inženjering" i Općine Goražde. "Ovo je jedan u nizu projekata koje je ova firma izvela do sada uspješno, a ja se nadam da ćemo i ovaj Projekat na opšte zadovoljstvo samim završetkom radova uspješno okončati. Na osnovu dosadašnjeg iskustva nismo imali problema kada su u pitanju imovinsko-prvni odnosi u općini Goražde, pa se nadam da ćemo to i ovaj put izbjeći", kazao je Šahmanović. Predsjednik mjesne zajednice Vitkovići Dževad Bekrija naveo je da se zapravo radi sedmoj fazi radova na proširenju kapaciteta vodovoda „Starac“, piše akta.ba. "Postojeći rezervoar značajno je niži od potreba stanovnika MZ Vitkovići. Izgradnjom novog rezervoara, koji se diže na kotu visočiji od 70 metara u odnosu na postojeći, doći ćemo u situaciju da će se snabdjevati 30 do 40 domaćinstava koja trenutno nemaju apsolutno nikakvo vodosnabdijevanje", objasnio je Bekrija.

D.K.



Izgradnja termoelektrana na području Tuzlanskog kantona...

## IZGRADNJA BLOKA 7 TE TUZLA KASNI GODINU DANA

- Bez Bloka 7 TE Tuzla bi snabdijevanje električnom energijom BiH do 2020. godine bilo u potpunosti ugroženo -



Vijeće ministara BiH zadužilo je Ministarstvo vanjske trgovine i ekonomskih odnosa da Narodnoj Republici Kini uputi pismo podrške za projekte iz BiH za koje postoje usvojene studije opravdanosti za njihovu realizaciju i za koje je predana aplikacija kineskoj izvozno-uvoznoj banci (EXIM banka). Riječ je o izgradnji Bloka 7 TE Tuzla o kojem je portal Klix.ba ranije pisao, a bez kojeg bi snabdijevanje električnom energijom BiH do 2020. godine bilo u potpunosti ugroženo. "Predsjedavajući Vijeća ministara BiH Denis Zvizdić ovlašten je da uputi pismo predsjedniku Vlade NR Kine s obrazloženjem projekata i molbom da se za projekte iz BiH, s obzirom da smo zemlja u razvoju, odobre povoljni preferencijalni krediti s kamatom manjom od dva posto", saopćeno je iz Vijeća ministara nakon

12. sjednice. Na ovo neobavezujuće pismo čeka se već duže vrijeme, nakon kojeg će Vlada FBiH donijeti odluku da li će biti garant kredita koji će se podići kako bi Elektroprivreda BiH realizirala ovaj izuzetno bitan projekat. "Još jedno od otvorenih pitanja koje treba riješiti sa investitorom je i valutna klauzula, tj. valuta u kojoj će se kredit vraćati, koja je u prijedlogu investitora izražena u američkim dolarima. Naš zahtjev je da to bude euro radi smanjenja valutnog rizika. Nesumnjivo je da se projekat Blok 7 treba realizirati i Vlada Federacije BiH će, u okviru svojih nadležnosti, svakako podržati sve aktivnosti koje će tome pridonijeti", rekli su za Klix.ba iz Ureda premijera FBiH. Dodali su kako će nakon što ispune ove korake Vlada FBiH ili Vijeće ministara BiH vjerovatno, prije donošenja konačne obavezujuće odluke, još jednom uraditi reviziju ovog projekta. Što traži dodatno vrijeme. Podsjetimo, Blokovi 3, 4, 5 i 6 u okviru TE Tuzla gasit će se periodično od ove do 2027. godine. Rokovi trajanja polako ističu, neki su već istekli ali rade s opravkama što je dodatni rizik kako za sami blok, tako i za ljude. S projektom Blok 7 se već kasni godinu dana jer je prema ranijim najavama, procedura trebala biti okončana krajem 2013. godine, a sa izgradnjom se trebalo krenuti u augustu 2014. godine. No, kako je dolazilo do smjene vlasti na nivou FBiH, tako se vršila revizija nanovo. Kasnilo se i sa izborom partnera. Tako je Konzorcij China Gezhouba group Co Ltd. CGGC – Lider i Guandong Electric Power Design Institute – GEDI izabran za partnera što je konačno saopćeno 26. juna 2014. godine. Do 2022. godine trebali bismo ostati bez tri Bloka (3, 4 i 5) ukupne snage 500 MW. Blok 7 koji se tek treba graditi imao bi snagu od 450 MW. Ukoliko se ne izgradi na vrijeme, snaga struje koju će imati TE Tuzla je 215 MW, što znači da će FBiH imati malu količinu struje za potrošače. Ako se procedura u vezi sa podizanjem kredita ne riješi ubrzo, s radovima će se kasniti uveliko jer za izgradnju jednog pogona potrebno je između četiri i pet godina. Posljedice će, kao i obično, trpjeti građani koji će se morati suočiti s redukcijama električne energije ili će BiH morati uvoziti dodatnu struju, što znači da će računati biti skuplji.

### ZATVOREN TENDER ZA TE BANOVICI: NAJPOVOLJNIJA PONUDA SHANGHAI ELECTRIC GROUP



Zatvoren je tender za izbor strateškog partnera za izgradnju i finansiranje termoelektrane u Banovićima. U prostorijama rudnika "Banovići" 20. jula 2015. godine upriličeno je javno otvaranje prispjelih ponuda kompanija, prenosi Indikator.ba. U roku od 60 dana konačne ponude dostavile su tri kineske kompanije – "Shanghai Electric Group Company Limited", "China Gezhouba Group Company Limited" i "Dongfang Electric Corporation Limited". Nakon procedure otvaranja ponuda ustanovljeno je da su sve tri firme dostavile tehničke i finansijske ponude u skladu sa tenderskom dokumentacijom, a cijene su se kretale oko 495 mil EUR bez obračunatog PDV-a. Najpovoljnija je ponuda kompanije "Shanghai Electric Group Company Limited" koja iznosi

495.000.006 EUR, a i cijene ponuda drugih kompanija kreću se u rasponu od nekoliko hiljada eura. Stručna komisija za odabir partnera će u narednom periodu detaljno analizirati prispjele tehničko-finansijske ponude, na osnovu kojih će dostaviti finalni prijedlog o izboru najpovoljnijeg ponuđača. Munever Čerčić, direktor Društva istakao je da će nastojati u što ranijem periodu donijeti odluku o izboru partnera, samim tim što procedura zahtijeva da se rang lista mora odobriti od Vlade i Parlamenta FBiH, a tek nakon toga konačnu odluku donosi Skupština društva. Mišljenja je da će se već do kraja godine potpisati ugovor sa strateškim partnerom. Podsjećamo da projekat predviđa snagu bloka 350 MW, sa lokacijom između dva rudnička kopa u Banovićima, a strateški je cilj za RMU "Banovići" kao i za cjelokupnu oblast energetike u BiH, saopćeno je iz RMU "Banovići".



Svi uz Fabriku deterdženta Tuzla...

## DITA RADI PUNOM PAROM, OBOREN REKORD

- Fabrika radi punom parom, obaraju se rekordi – Imel Lukavac oprostio stari dug – Omega uručila vrijednu donaciju -



Tuzlanska fabrika deterdženata Dita, radi i proizvodi kao u najbolje dane ove fabrike, već je oboren i rekord u proizvodnji. Nedavno je sa proizvodnih traka ovog nekadašnjeg privrednog giganta skinuto u jednom danu 10.000 pakovanja deterdženta 3de, što je za čak 3.000 bočica više u odnosu na zlatna vremena tuzlanskog preduzeća, javlja tv1. Dita je od dana pokretanja proizvodnje do danas proizvela i prodala svojih proizvoda u vrijednosti većoj od 250 hiljada maraka, radnici su dobili i dio plate a početkom sljedećeg mjeseca ce dobiti i platu za juli. Osim tečnih i agresivnih deterdženata, Dita će uskoro pokrenuti proizvodnju praskastog programa. Za tu proizvodnju neophodna je izgradnja parovoda od termoelektrane do Dite, saglasnost je dala elektroprivreda BiH i čeka se početak radova. Pozitivna energija iz ove fabrike, privukla je i mlade obrazovane ljude, koji ovdje dolaze da volontiraju i pomognu da se fabrika podigne na noge. Dita uz kontinuiranu proizvodnju očekuje strateškog partnera, iako se spekulisalo da bi to mogao biti tuzlanski Bingo, iz sindikata su kazali da nisu vođeni nikakvi razgovori na ovu temu, također su istakli da je Bingo Diti pomogao kroz nabavku repromaterijala kao i kroz distribuciju proizvoda. U narednom periodu Dita ce svoje proizvode izvoziti i na evropsko

tržište, naravno uz proširenje kapaciteta proizvodnje, jer sadašnja proizvodnja uspijava podmiriti samo BH tržište.

## IMEL OPROSTIO DUG FABRICI DETERDŽENATA DITA TUZLA



U prostorijama kompanije IMEL Lukavac, predstavnik Fabrike deterdženata Dita Tuzla potpisao je Ugovor o poslovnoj saradnji sa Imel doo i time osigurao softversku i hardversku podršku u praćenju cjelokupnog procesa poslovanja fabrike. "Fabrika Dita je naš dugogodišnji partner, iskreno se radujemo današnjem momentu i drago nam je što i kompanija Imel može doprinijeti daljem poslovanju Dite. Softversko praćenje procesa proizvodnje, komercijalnog, robnog, finansijskog kao i ostalih elemenata poslovanja neophodno je za Ditu jer u svakom momentu moraju raspolagati sa pravim informacijama koje su od ključne važnosti za donošenje budućih odluka, ali i otklanjanja uskih grla u procesu proizvodnje radi što lakšeg prevazilaženja problema u poslovanju. Naš software IMEL BIS je integralni informacioni sistem koji prati i pruža podršku za specifične industrije i organizacije

(mala, srednja i velika preduzeća bez obzira na djelatnost, šumsko-privredna preduzeća, zdravstvene institucije, javni sektor, industrija namještaja, poljoprivredna proizvodnja, proizvodnja lijekova, računovodstvene agencije, komunalna preduzeća i dr.). Poslujemo sa preko 300 kompanija iz cijele BiH i danas potpisani ugovor predstavlja još jedan izazov za nas", izjavila je Amra Brkić, marketing menadžer kompanije IMEL. Stečajni upravnik Dite, također nije krio oduševljenje potpisanim ugovorom:- Pokrenuta je proizvodnja, kupci su prepoznali naše proizvode i dali nam vjetar u leđa, trenutno je neophodna softverska i hardverska podrška koja će nam olakšati poslovanje. Fabrika Dita je i ranije radila sa kompanijom Imel i tu ne želimo da mijenjamo bilo šta, ubijeden sam da će nam njihovo iskustvo i softver pomoći u daljnjem poslovanju. Sve ovo radimo kako bi uzdigli fabriku i stvorili joj novu vrijednost, jer ono što ne radi samo propada. Hvala svima koji nam pomažu, izjavio je Hajrudin Kunalić, stečajni upravnik Dite. Bitno je napomenuti da je Uprava Imel-a na juče održanom sastanku donijela odluku o oprostima svih ranije nastalih a ne izmirenih obaveza Dite prema Imelu. "Na sastanku Uprave naše kompanije, jednoglasno je usvojen Prijedlog o oprostima svih ranije nastalih a ne izmirenih obaveza Fabrike deterdženata Dita. Naša kompanija je odlučila oprostiti dugovanja i na taj način pomoći Diti i njenim radnicima u ispunjenju ciljeva. Nadamo se da će i ostali Ditini povjerioci slijediti naš primjer jer to je u ovim trenucima Diti najpotrebnije", izjavio je Mevludin Čeliković, direktor IMEL-a.

## VRIJEDNA DONACIJA IZ "OMEGE" ZA "DITU"



Od prvog dana borbe radnika Dite sa održivost proizvodnje i plasiranje gotovih proizvoda, Omega doo Živinice, je bila uz njih. Putem veleprodajne distributivne mreže, Omega doo već plasira na cijelo tržište BiH Dite proizvode. Omega kao jedan od najvećih distributivnih lanaca u Bosni i Hercegovini će raditi bez zarade dok se Dita ne oporavi. Stojimo na raspolaganju u svakom vidu pomoći. Nismo stali na ovome, jutros smo uručili donaciju svim radnicima Dite, pakete našeg poslovnog partnera Mlekarna Celeia iz Slovenije, proizvodi Zelene doline. Ditini radnici nisu sami, Omega je tu da podrži lokalnog partnera, kao i radnike Dite, saopćeno je iz Omega doo Živinice.

D.K.



Uspješno saniranje šteta od prošlogodišnjih poplava...

## POZITIVNI PRIMJERI: "HERCEG" SREBRENİK I "EM – ONIX" LUKAVAC

- Novcem iz fondova EU-a kupljeni strojevi, sirovine i sanirani proizvodni objekti – Upošljavanje novih radnika -

### OBNOVA PROIZVODNJE I NOVO ZAPOŠLJAVANJE



U okviru programa oporavka od prošlogodišnjih poplava, Europska unija donirala je 283.766 eura za devet malih i srednjih poduzeća te 125 komercijalnih gospodarstvenika iz tuzlanske regije, pomoću čega su, između ostalog, sačuvana brojna radna mjesta. "Ovaj program doprinosi ekonomskom oporavku malih i srednjih poduzeća, a podrška je namijenjena za kupovinu strojeva i sirovina potrebnih u proizvodnji, kao i za rekonstrukcije i sanacije poplavljenih objekata. Inače, u okviru ovog projekta, sredstvima građana Europske unije u iznosu od četiri milijuna eura podržano je više poduzeća iz BiH s donacijama između 10.000 i 90.000 maraka, a jedno od njih je poduzeće 'Herceg' iz Srebrenika, koje se bavi proizvodnjom vrata i prozora i koje bi kao dobra i stabilna

kompanija preživjela i bez ove pomoći, iako se tvrtka na ovaj način brže oporavila od posljedica poplava", izjavio je za Agenciju Anadolija Massimo Mina, šef sekcije operacija za program Europske unije za oporavak od poplava. Ramiz Karić, direktor društva Herceg rekao je da je pomoću doniranih sredstava ova kompanija sanirala štete u objektima te nabavila novi stroj za rezanje. "Od 2001. godine imamo svoje mjesto na svjetskom tržištu, gdje nema milosti i gdje se svaki dan moramo dokazivati. Nakon poplava, zahvaljujući zalaganju naših uposlenika, uspjeli smo ne probiti specifične rokove za izvoz i našim kupcima u inozemstvu robu smo isporučili u rekordnom roku. Inače, najveći nam je problem to što naši zaposlenici ne mogu ostvarivati radno-pravni status u drugim zemljama, gdje bi naši radnici trebali nakon transporta ugrađivati i montirati proizvode", naveo je Karić. Dodao je kako je Herceg nakon prošlogodišnje poplave uspio zaposliti 12 novih radnika, a da i dalje postoji potreba za upošljavanjem odgovarajuće radne snage.

### FIRMA "EM-ONIKS" UPRKOS ŠTETAMA OD POPLAVA UPOSLILA 10 NOVIH RADNIKA



"Firma "Em- Oniks" predstavlja odličan primjer korisnika Programa Evropske unije (EU) za oporavak od poplava, konkretno komponente za podršku malim i srednjim poduzećima, jer su uprkos ogromnoj šteti uzrokovanoj poplavama uspjeli povećati broj uposlenih", kazao je feni šef Sekcije operacija za socijalni razvoj, civilno društvo i prekograničnu saradnju Delegacije EU u Bosni i Hercegovini Massimo Mina. To je izjavio nakon posjete firmi "Em-Oniks" u Lukavcu, koja je dobila grant sredstva u okviru EU Programa za oporavak od poplava. Ova kompanija, ističe, pretrpjela je velike štete i zaista im je bila potrebna pomoć, prvenstveno da bi mogla sačuvati postojeća radna mjesta i da ne dođe do smanjenja broja uposlenika. Također je naglasio da je "Em-Oniks" nakon poplava nastavio izvršavati obaveze u smislu isplata plaća, uplata doprinosa, PDV-a i ostalih obaveza prema državi. Osim toga, kaže, uspjeli su povećati broj radnika, što

pokazuje da se ova kompanija kroz ovakvu direktnu pomoć, ne samo vratila na stanje prije poplava, već je sada uspješnija. Direktor i vlasnik firme "Em-Oniks" Enes Memić, koja je jedna od vodećih firmi u BiH u proizvodnji profila za suhu gradnju, kazao je da procijenjena šteta od poplava iznosi oko dva miliona KM. Za oporavak firme, kako je rekao, od Federalnog ministarstva za industriju i energetiku dobili su 330.000 KM, uz pomoć kojih su izgradili jednu halu, a od EU Programa dobili su iznos od oko 80.000 KM, koje su upotrijebili za kupovinu repromaterijala. Istakao je da su, uprkos ogromnoj šteti, uspjeli ne samo da zadrže isti broj radnika koje su imali prije poplava, već su čak zaposlili 10 novih. EU Program pokrenut je s ciljem da omogući normalizaciju životnih uvjeta u lokalnim zajednicama i osigura da pomoć stigne do najugroženijih nakon majskih poplava 2014. godine. Ukupna vrijednost programa je 43,52 miliona eura, od čega je 42,24 miliona eura osigurala EU, a to su sredstva koja se EU obavezala izdvojiti na donatorskoj konferenciji održanoj u Briselu u julu prošle godine. Finansijska pomoć korištena je za pružanje javnih usluga, sanaciju objekata, infrastrukture, stambenih jedinica za najugroženije osobe te socijalno-ekonomski oporavak lokalnih zajednica. Program implementiraju UNDP, Fond UN-a za djecu (UNICEF) i Međunarodna organizacija za migracije (IOM).

D.K.

Iz Vlade Tuzlanskog kantona...

## ODRŽAN PRVI SASTANAK INTERRESORNE GRUPE



Ministarstvo za razvoj i poduzetništvo Tuzlanskog kantona je u Kantonalnoj privrednoj komori Tuzla, organizovalo prvi radnik sastanak Interresorne radne grupe za organizaciju okruglog stola i tematske sjednice Skupštine Tuzlanskog kantona na temu "Stanje u privredi Tuzlanskog kantona. Naime, na sjednici Vlade Tuzlanskog kantona održanoj srednjom jula, usvojen je tekst Inicijative Ministarstva razvoja i poduzetništva za održavanje tematske sjednice Skupštine Tuzlanskog kantona na temu „Stanje u privredi Tuzlanskog kantona“. S tim u vezi, delegirani su po jedan predstavnik u ime nekoliko organizacije koji će u okviru Interresorne radne grupe učestvovati u pripremi tematske sjednice Skupštine Tuzlanskog kantona na temu „Stanje u privredi Tuzlanskog kantona“, kao i u pripremi okruglog stola na navedenu temu. U interresornu grupu su ušli i na prvom sastanku potvrđeni, predstavnici Ministarstva za razvoj, energetiku i rudarstvo TK, Ministarstva za poljoprivredu, šumarstvo i vodoprivredu TK, Ministarstva

za trgovinu, turizam i saobraćaj TK, Ministarstva za rad, socijalnu politiku i povratak TK, Ministarstva za razvoj i poduzetništvo TK, Kantonalne privredne komore Tuzla, Obrtničke komore Tuzlanskog kantona, Udruženja za razvoj NERDA, Nezavisnog biroa za razvoj Gradačac.

## STEČAJ U LIVNICI ČELIKA U TUZLI JE NUŽNOST



Stanje u Livnici čelika u Tuzli nakon pokretanja stečajnog postupka u ovoj fabrici, te načini zbrinjavanja radnika bili su tema sastanka premijera Tuzlanskog kantona Bege Gutića i ministra industrije, energetike i rudarstva Srđana Mićanovića sa predstavnicima Sindikata Livnice. Predstavnici radnika jasno su poručili da pozdravljaju pokretanje stečajnog postupka u ovoj tuzlanskoj fabrici, te da je stečaj trebalo pokrenuti prije 15-tak godina. S tim u vezi Premijer i Ministar su još jednom istakli da ovaj saziv Vlade Tuzlanskog kantona nije prouzročio probleme niti u jednoj fabrici u Tuzlanskom kantonu, ali se od početka mandata aktivno uhvatio u koštac i radi na njihovom sistemskom rješavanju. „Vlada ne odustaje od Livnice čelika. Stečaj koji je pokrenut planiran je kao strukturirani, po sličnom principu kako to planiramo i u Tvornici transportnih uređaja u Tuzli. Ne radi se o likvidaciji kao što je to najvjerojatnije slučaj sa FO

„Aida“ gdje su dugovanja višestruko veća od vrijednosti kapitala" rekao je premijer Gutić i dodao da je stečaj u Livnici nužnost, jer „nastavak poslovanja po dosadašnjem modelu bi sigurno rezultirao odumiranjem Livnice, kao što je polako i odumirala u proteklom periodu". Kada je u pitanju materijalno zbrinjavanje radnika, rečeno je da za rješavanje statusa radnika ima više modela i ono ovisi o putu kako se bude odvijao stečajni postupak. Vlada Tuzlanskog kantona je ove godine već obezbijedila sredstva za uvezivanje radnog staža svim radnicima koji zaključno sa krajem ove godine ispunjavaju uslove za penzionisanje. Drugi model je uvezivanje radnog staža po federalnom Zakonu o uvezivanju radnog staža, koji bi trebao biti na snazi od januara naredne godine. „Vlada u potpunosti razumije ogorčenje radnika, ali nažalost ne posjeduje čarobni štapić niti kofere novca kojim bi se mogla „kupiti“ rješenja", složili su se premijer Gutić i ministar Mićanović, uz obećanje da će u narednim danima posjetiti Livnicu čelika i u krugu fabrike razgovarati sa stečajnim upravnikom, koji je jedina odgovorna osoba za dalje poslovanje Livnice, i predstavnicima radnika ove fabrike. U ime radnika sastanku su prisustvovali povjerenici Sindikata radnika Livnice čelika Osman Sofić i Amir Begović.

## DELEGACIJA VLADE PONOVO RAZGOVARALA SA RADNICIMA TVORNICI TRANSPORTNIH UREĐAJA



Delegacija Vlade Tuzlanskog kantona razgovarala je sa predstavnicima radnika Tvornice transportnih uređaja (TTU) u Tuzli, koji su se okupili i protestovali ispred zgrade Vlade. „Vlada će u TTU-u sigurno pokrenuti stečajni postupak i ubijedeni smo da će stečaj u ovoj fabrici dati pozitivne efekte", istakao je premijer Gutić i dodao da „kamo sreće da je stečaj pokrenut prije 7-8 godina, danas bi smo imali znatno kvalitetniju situaciju". S tim u vezi radnici ističu da nemaju ništa protiv pokretanja stečajnog postupka, ali da su materijalno zbrinjavanje radnika i čvrste garancije ono što bi bio zadovoljavajući ishod. Imajući u vidu težak ekonomski – socijalni status uposlenika u TTU-u dogovoreno je da se upriliči sastanak predstavnika uprave i sindikata TTU-a, sa upravom ITT-a, preko kojeg TTU posluje, i ministra industrije, energetike i rudarstva Srđana Mićanovića, na kojem

će se razgovarati o mogućnostima prevazilaženja međusobnih problema TTU-a i ITT-a i nastavka saradnje u narednih nekoliko mjeseci dok se u Tvornici transportnih uređaja ne pokrene stečajni postupak. Po otvaranju stečaja će za radnike, u skladu sa zakonskom regulativnom biti omogućeno socijalno zbrinjavanje, akcentirano je na sastanku. „Više je modaliteta za uvezivanje radnog staža jer to je ono što radnike sleduje. Radnicima se sada ne nudi sporazum kao radnicima fabrike obuče „Aida“ jer TTU ima velike šanse i perspektivu da se kroz stečaj stabilizira i osigura znatno svjetliju budućnost" rekli su članovi vlade koji su prisustvovali današnjem sastanku, te dodali da je sporazum, poput onoga koji je ponuđen radnicima Aide, zadnje rješenje. Zadovoljstvo postignutim dogovorom istakao je i predsjednik sindikata metalaca TK Mešan Vildić, koji je prisustvovao sastanku.

D.K.

Premijeri u posjeti Tuzlanskom kantonu...

## **RADNI SASTANAK 7 PREMIJERA SA PODRUČJA FBiH**

- Sastanak na inicijativu Bege Gutića premijera Tuzlanskog kantona –



Na poziv premijera Tuzlanskog kantona Bege Gutića u radnu posjetu Tuzlanskom kantonu odazvalo se šest premijera: Unsko-sanskog kantona, Izudin Saračević, Zeničko-dobojskog kantona, Miralem Galijašević, Srednjo-bosanskog kantona, Tahir Lendo, Bosansko-podrinjskog kantona, Emir Oković i Hercegbosanske županije Livno, Draško Dalić, te premijer Posavskog kantona, Marijan Klaić. Bila je to prilika za razgovor o međukantonnoj saradnji a prije svega Zakonu o pripadnosti javnih prihoda u Federaciji BiH. "Cilj sastanka je bio da razmijenimo iskustva i informacije o funkcionisanju kantonalnih Vlada, te načinu rješavanja

problema s kojima se susrećemo. Između ostalog, bilo je riječi i o inicijativama koje su pokrenute za izmjenu Zakona o pripadnosti javnih prihoda FBiH. Jedan od zaključaka razgovora je da se inicijativa za izmjenu i dopunu Zakona o pripadnosti javnih prihoda u Federalnom parlamentu, koja je već pokrenuta od poslanika s područja TK, nastavi i ubrza izjašnjavanje Parlamenta FBiH o Prijedlogu zakona. Tema razgovora je bila i strategija razvoja kantona, koja se radi s UNPD-om i koja je u završnoj fazi, te da je iskoristio priliku da upozna kolege iz drugih kantona sa načinom njene izrade", istakao je Bego Gutić premijer Tuzlanskog kantona..

Tema razgovora bila je i Strategija i razvoj kantona, koju Vlada Tuzlanskog kantona na čelu sa Ministarstvom razvoja i poduzetništva izrađuje u saradnji sa UNPD-om i koja je u završnoj fazi izrade te je ovom prilikom Ministrica razvoja i poduzetništva Mirela Đaković iskoristila priliku da kolegama s drugih kantona predstavi način izrade i značaj implementacije iste. „Sastali smo se na poziv premijera TK, da razgovaramo o suradnji i problemima kantona, prvenstveno o problemu sa proračunom i zadovoljavanjem svih potreba", izjavio je premijer Posavskog kantona, Marijan Klaić, te istakao da je jedna od tema pitanje pravedne raspodjele



poreza po osnovu PDV prihoda "Posavski kanton se već deset godina bori da korigira koeficijent raspodjele poreza, s obzirom na to da je napravljena nepravda u proteklih deset godina. Postoji nepravda i prema drugim kantonima i postoji inicijativa za davanje prijedloga određenim institucijama da se napravi pravednija raspodjela", izjavio je premijer Klaić. Na sastanku je između ostalog zaključeno da je finansijsko stanje budžeta u većini kantona u Federaciji Bosne i Hercegovine (FBiH) zabrinjavajuće te da su kantoni sve bliže stanju finansijske neodrživosti, a jedan od razloga za to je neravnopravnost u raspodjeli javnih prihoda, otplati javnog duga, te organizaciji i funkcionisanju javnih preduzeća na prostoru FBiH. Prisutni premijeri kantona podržali su inicijativu grupe poslanika sa područja TK, da se izvrše izmjene pomenutog Zakona te zahtijevaju da se prijedlog o izmjenama i dopunama Zakona o pripadnosti javnih prihoda u FBiH uvrsti bez odlaganja na dnevni red oba doma Parlamenta FBiH. Između ostalog, pokreću inicijativu prema Vladi FBiH da racionalizira način organizovanja javnih preduzeća poput telekoma, elektroprivrede, rudnika, pošte i tome slično te da preduzećima kojima upravlja, poput ZD Rudnika Kreka Tuzla, RMU Zenica, Kakanj, Breza blagovremeno izmiruje svoje obaveze, kao što su zdravstveno osiguranje i koncesione naknade prema kantonima.

D.K.



Iz tuzlanskih “Pekare” i “Mljekare”...

## DVA RAZLIČITA LICA PRIVATIZACIJE



### Mlin i pekara Ljubače: Prodaja u prvom polugodištu povećana za 25 posto

Prehrambena industrija Mlin i Pekara Ljubače, članica AS GROUP, u prvom polugodištu ove godine povećala je prodaju hljeba i peciva 25 posto u odnosu na isti period prošle godine. Time je MIP Ljubače učvrstio lidersku poziciju na tržištu pekarskih proizvoda na području Tuzlanskog kantona. „U prvih šest mjeseci ove godine povećali smo i broj prodajnih mjesta, tako da se sada naše brašno, hljeb, peciva, pite i kolači distribuiraju na više od 650 adresa, od Kladnja do Brčkog, na području 12 općina. Unaprijedili smo saradnju s većinom trgovaca koji sve više uviđaju kvalitet naših proizvoda. Osim toga, širi se i proizvodni asortiman MIP Ljubače. Nedavno smo na tržište plasirali krofne u trgovačkom pakovanju kakao i marelica, i već sada imamo odlične prodajne rezultate. Reaktivirali smo proizvodnju integralnog

pšeničnog brašna, i tu bilježimo pozitivne reakcije sa tržišta“, rekao je Nermin Karić, direktor MIP Ljubače. U kategoriji mlinjskih proizvoda MIP Ljubače udvostručena je prodaja griza i palente, a na tržište je plasiran novi proizvod – Fina palenta, koja će vrhunskim kvalitetom pridobiti i najzahtjevnije kupce. „Ponovno smo uspostavili saradnju s vodećim mljekarama u BiH kojima isporučujemo stočnu hranu za krave muzare. Idemo i korak dalje, pa upravo privodimo kraju investiciju u nabavku opreme za peletiranje, kako bismo tržištu ponudili najkvalitetniju stočnu hranu za sve vrste životinja“, rekao je Karić. Zdrava priroda je osnov za proizvodnju zdrave hrane, a upravo Mlin i Pekara Ljubače posluje u sigurnom, prirodnom i zdravom okruženju, bez industrijskih zagađenja i s velikim brojem sunčanih dana, koristeći zdrave vode.



### PPM Tuzla: Upitno dalje poslovanje, broj radnika spao na dva

Uprava društva Prerada i promet d.o.o. Tuzla (PPM) ne očekuje da će društvo bez značajne finansijske pomoći većinskog vlasnika moći nastaviti poslovanje u doglednoj budućnosti, navodi se u izvještaju nezavisnog revizora Respekt Tuzla za 2014. godinu. Nekadašnja mljekara sa značajnom proizvodnjom mlijeka i mliječnih proizvoda, koja je preregistrovana u društvo za trgovinu, 2014. godinu završila je pozitivno sa 19 hiljada KM dobiti, nakon što je u 2013. godini poslovala s gubitkom od 2,2 miliona KM. Međutim, gubitak iznad visine kapitala iznosi 1,2 miliona KM. U periodu od 2004. do 2012. godine ostvareni su gubici u ukupnom iznosu od oko 10 miliona, a samo je 2005. i 2009. godine društvo poslovalo s minimalnom dobiti. Zbog gubitaka matično društvo

Ljubljanske mlekarne je 2012. pokrenulo program restrukturiranja koji je predviđao da će se u PPM-u proizvoditi UHT mlijeko, maslac i, kao opcija za vrijeme viškova, mlijeko u prahu. Dio proizvodnje za fermente se prenosi u Ljubljanske mlekarne d.d. Ljubljana, a dio proizvodnog programa se zbog niskog obima ukida. Istovremeno se nije planirao značajno smanjiti prodajni asortiman jer će biti povećana prisutnost proizvoda iz svih robnih marki, koje su u vlasništvu grupe Ljubljanske mlekarne. Iako su realne aktivnosti u toku 2013. i 2014. godine značajno promijenjene, nije vršena dopuna ili izmjena programa prestrukturiranja, koji bi potvrdio realizovane aktivnosti povezane sa prestrukturiranjem. Nadzorni odbor Društva je na sjednici 14.03.2014. godine konstatovao da Društvo 2014. godine napušta prvobitno doneseni Program prestrukturiranja. Također, na istoj sjednici donesen je zaključak o internoj prodaji procesne opreme radi osiguranja sredstava za izmirivanje obaveza prema povjeriocima. U skladu s istim zaključkom Društvo će nastaviti da kroz daljnju reorganizaciju poslovanja osigura uvjete za oporavak i nastavak poslovanja, i osigura sredstva za izmirenje dugoročnih obaveza prema Ljubljanskim mlekarnama. Zavisno o uspjehu provedene reorganizacije odlučit će se i o mogućoj prodaji ostale dugotrajne materijalne imovine, zbog čega je sva dugotrajna imovina na dan bilansa reklasifikovana u sredstva namijenjena prodaji, navodi se u revizorskom izvještaju. Polovinom 2014. društvo je umjesto ranije djelatnosti prerada mlijeka i mliječnih proizvoda registrovalo kao osnovnu djelatnost trgovinu na veliko mlijekom, mliječnim proizvodima, jajima, jestivim uljima i mastima. U međuvremenu, u skladu sa programom restrukturiranja, broj zaposlenih u PPM-u počeo se smanjivati. Programom zbrinjavanja viška zaposlenih iz 2013. godine je predviđeno smanjenje broja zaposlenih sa 67 na 5 zaposlenih. Trenutno su u Društvu zaposlena 2 radnika. Ljubljanske mlekarne, koje su preuzele većinsko vlasništvo u PPM-u Tuzla 2003. godine, kontrolišu 95,9 posto dionica u društvu.

D.K.



Aktivnosti ovlaštenog operatera sistema upravljanja ambalažnim otpadom...

## EKO ŽIVOT FINANSIRAO NABAVKU PRESE ZA PET AMBALAŽU U ODŽAKU



Ovlašteni operater sistema upravljanja ambalažnim otpadom Eko život d.o.o. Tuzla finansirao je nabavku prese za PET ambalažu za svog servisera na području Posavskog kantona Zeleni planet-Green Planet u Odžaku s ciljem bržeg i efikasnijeg sakupljanja odnosno baliranja PET ambalaže, saopćeno je iz Eko života. Prema riječima direktorice Eko života Lidije Tomić, pomoću ove prese PET ambalaža smanjuje se i do 20 puta, te tako omogućava lakše prenošenje i odvoz do reciklažnih dvorišta odnosno postrojenja. "Na ovaj način omogućiće se lakše prenošenje i odvoz PET ambalaže do reciklažnih dvorišta odnosno postrojenja. Želimo napome-

nuti da su naši serviseri izuzetno bitni u cijelom lancu upravljanja ambalažnim otpadom, s obzirom da u ime Eko život-a prikupljaju, zbrinjavaju i vrše transport različitih vrsta ambalaže do reciklažnih dvorišta", izjavila je Tomić. Eko život kao najpovoljniji operater sistema upravljanja ambalažnim otpadom pozivaju privredne subjekte/obveznike sistema da se uključe u sistem i po najpovoljnijim cijenama ispune svoje zakonske obaveze.

Turističku ponudu TK treba predstaviti stranom tržištu...

## SASTANAK SA PREDSTAVNICIMA WIZZ AIR-A



Predstavnici avio kompanije Wizz Air su posjetili Tuzlu. Održano je nekoliko sastanaka sa predstavnicima Vlade TK, Turističke zajednice TK i turističkih agencija u cilju unapređenja turističke ponude našeg kantona i otvaranja prema stranom tržištu. TK ima veliki turistički potencijal, istakao je za RTV7 Edin Ajanović, ministar trgovine, turizma i saobraćaja TK, međutim našu turističku ponudu treba objediniti, kako bi bila privlačnija gostima. Od otvorenja Međunarodnog aerodroma Tuzla sve više gostiju dolazi u TK, a ostvar-


uje se i veći broj noćenja što donosi i prihode. Gostima treba ponuditi raznolik turistički sadržaj kako bi se ponovo vratili i doveli nove goste. Tuzlanski aerodrom proširenjem kapaciteta i usluga pokušava da odgovori na porast broja putnika. Već je ostvarena odlična saradnja sa ostalim avio kompanijama što olakšava plasiranje turističkog proizvoda TK van naše zemlje. Između ostalih, posebno su izdvojena Panonska slana jezera, koja spadaju u jednu od deset najpoželjnijih destinacija u našoj zemlji. Gosti iz Wizz Air – a i tour operateri upoznali su se sa ljepotama Pannonice i ponudom Grada Tuzle kako bi stekli uvid u bogatu turističku ponudu koju naš kanton nudi.

D.K.



## Sajamske aktivnosti...

### U VTK/STK BIH ODRŽANA PROMOCIJA SAJMA „EKOBIS 2015“



Održivi razvoj u ruralnim područjima, tema je 13. međunarodnog ekološkog sajma „EKOBIS 2015“, koji će biti održan Bihaću od 10. do 13. septembra. Tim povodom je u Vanjskotrgovinskoj/Spoljnotrgovinskoj komori BiH Bosne i Hercegovine održana promocija Sajma na kojoj je istaknuto da će i ove godine EKOBIS biti prilika za ostvarivanje novih poslovnih kontakata i mjesto regionalnog okupljanja privrednika, te predstavnika privrednih komora iz šire regije. Istakao je to generalni sekretar Vanjskotrgovinske komore BiH, Nihad Bajramović, u svom obraćanju na promociji sajma. Ove godine regija partner je Karlovačka županija, a HGK Županijska komora Karlovac organizirat će po prvi put nastup Hrvatske gospodarske komore i hrvatskih gospodarstvenika na jedinst-

venom izložbenom prostoru sajma. Sajam EKOBIS, kao manifestaciju ekologije, ekoturizma i ekološke industrije, još od 2003. godine organizira Privredna komora Unsko-sanskog kantona (PK USK). Predsjednik PK USK, dr.sc. Ismet Pašalić je prezentirao sajam i najavio da će prateći sadržaji sajma ove godine biti brojni. Izdvojio je međunarodnu konferenciju posvećenu održivom razvoju u ruralnim područjima, konferenciju o energetske efikasnosti „Dani energije Bihać“, konferenciju o šumarstvu i drvoprerađi, a regionalno povezivanje obilježiti će večer regionalnog partnerstva, dok će na već tradicionalnoj „Smaragdnoj večeri“ biti dodijeljene nagrade najuspješnijim izlagačima sajma. Bit će održan i okrugli stol o perspektivama razvoja obrta, okrugli stol o perspektivama uzgoja malina s podacima o izvozu, a za najmlađe dječje ekološke radionice i finale eko-kvizu „Una i ekologija – EKOBIS 2015“. Generalni pokrovitelj ovogodišnjeg sajma, naglasio je predsjednik Pašalić, je Vlada USK, a medijski pokrovitelj BHT1, te naveo da također očekuju podršku od federalnih ministarstva okoliša i turizma, razvoja, poduzetništva i obrta, te poljoprivrede, vodoprivrede i šumarstva, ali i od Fonda za zaštitu okoliša FBiH i drugih. Posebnu podršku Privredna komora USK u organizaciji sajma „EKO-BIS“ ima od Vanjskotrgovinske komore BiH. Na 12 već održanih sajmova EKOBIS je bilo više od 3.161 izlagača i 140.000 posjetilaca. Bogatstvo pratećih sadržaja dokazuje broj od oko 390 održanih pratećih sadržaja za 12 godina sajma: stručni skupovi, okrugli stolovi, seminari, prezentacije i promocije kompanija, proizvoda i projekata, poslovni susreti privrednika, različite ekološke akcije, dječje ekološke radionice, eko-kviz, kulturno-umjetnički, sportsko-rekreacijski sadržaji, te 12 uspješnih međunarodnih konferencija o regionalnoj suradnji, kao glavnom pratećem sadržaju svih 12 sajmova. Ove godine očekujemo da održimo nivo prošlogodišnjeg sajma i isti broj izlagača – izjavio je Pašalić, naglašavajući da će i ove godine posebno biti predstavljeni organski proizvođači. Također je istakao važnu činjenicu da se čitav niz novih ideja i projekata realiziraju na osnovu ranijih rezultata projekata EKOBIS-a. EKOBIS je izložbeno-prodajnog karaktera, a dosad su na ovom sajmu promovirani izlagači iz 16 zemalja: Hrvatska, Srbija, Slovenija, Slovačka, Češka, Italija, Austrija, Njemačka, Mađarska, Crna Gora, Kina, Indonezija, Turska, Finska, Izrael i BiH.

Uz sajam "ZDRAVO-DOMAĆE-PRIRODNO"...

### POZIV NA SASTANAK PREDSEDNIKA REGIONALNIH KOMORA 2. I 3. 10.



Dejan Tošić predsjednik Regionalne privredne komore Zaječar, uputio je poziv za susret regionalnih privrednih/gospodarskih komora zemalja Regiona, ujedno i na Sajam "ZDRAVO-DOMAĆE-PRIRODNO": "Zadovoljstvo nam je da Vas pozovemo na susret regionalnih privrednih/gospodarskih komora zemalja Regiona u organizaciji Regionalne privredne komore Zaječar. Sastanak će biti održan od 02-03. oktobra 2015. godine, u vreme održavanja IV Međunarodnog sajma "ZDRAVO-DOMAĆE-PRIRODNO" u Zaječaru.

Link na kome se može videti Sajam "ZDRAVO-DOMAĆE-PRIRODNO" 2014. godine je:  
<https://www.facebook.com/media/set/?set=a.766690226701855.1073741969.460528873984660&type=1>

Organizovanje ovih susreta je u skladu sa zaključcima skupa privrednih komora u Celju, septembra 2014. godine. Tom prilikom je dogovoreno redovno održavanje sastanaka na regionalnom nivou, a u cilju jačanja komorske saradnje, zajedničkih nastupa na trećim tržištima, učestvovanje u EU projektima/razmena iskustava u korišćenju EU fondova. Sastanak je održan u sklopu Međunarodnog obrtničkog sajma u Celju. Skup predstavnika privrednih/gospodarskih komora Regiona organizovan je i u Županijskoj komori Split 06. marta 2015. godine.

Molimo Vas da potvrdite Vaše učešće, najkasnije do 1. avgusta 2015. godine.

Detaljna Agenda će biti blagovremeno poslata. Kontakt osobe u RPK Zaječar su:  
- Dejan Tošić, predsednik, tel. +381 64 8 157 357, e-mail [dejan.tosic@rpka.rs](mailto:dejan.tosic@rpka.rs) i  
- Maja Milutinović, sekretar Centra za EOI, tel. +381 64 8 157 307,  
e-mail [maja.milutinovic@rpka.rs](mailto:maja.milutinovic@rpka.rs).

RPK Zaječar želi Vam dobrodošlicu u RPK Zaječar".

D.K.



**KATASTROFALNO STANJE U PIVARSKOJ INDUSTRIJI BIH, PIVARI TRAŽE...**

Predstavnici Grupacije proizvođača piva u BiH Vanjskotrgovinske komore BiH su prezentovali aktuelnu ...

**PKKS 18. JUNA ORGANIZUJE PREZENTACIJU FIRME PBS BRNO...**



Privredna komora Kantona Sarajevo (PKKS) organizirat će u četvrtak 18. juna 2015. godine u 10.00 sat...

**U POMOĆ DITI SE UKLJUČUJU "OMEGA" I KOMORA...**



Na inicijativu Edima Džambića direktora "Omega" doo Živinice i Nedreta Kikanovića predsjednika Kanton...

**Pregled usluga Komore**



Komorski informator



Privredna kretanja

**VIJESTI**

**NAJAVE**

**POZIVI**



PKKS 18. juna organizuje prezentaciju firme PBS Brno  
17.06.2015.



Prezentacija THYSSEN SCHACHTBAU GMBH, 18. juna  
17.06.2015.



Katastrofalno stanje u pivarskoj industriji BiH, pivari traže pomoć institucija  
17.06.2015.



Šta Kinezi planiraju graditi u BiH: Priča se o milijardama, uložena tri miliona KM  
16.06.2015.



BIMAL dogovorio izvoz jestivog ulja u Kinu  
15.06.2015.



**AKTUELNO**



**PKKS 18. juna organizuje prezentaciju firme PBS Brno**

17.06.2015.

Privredna komora Kantona Sarajevo (PKKS) organizirat će u četvrtak 18. juna 2015. godine u 10.00...



**Prezentacija THYSSEN SCHACHTBAU GMBH, 18. juna**

17.06.2015.

Kantonalna privredna komora Tuzla u saradnji sa Thyssen Schachtbau GMBH, srdačno Vas pozivaju da...



**Katastrofalno stanje u pivarskoj industriji BiH, pivari traže pomoć institucija**

17.06.2015.

Predstavnici Grupacije proizvođača piva u BiH Vanjskotrgovinske komore BiH su prezentovali...



**Šta Kinezi planiraju graditi u BiH: Priča se o milijardama, uložena tri miliona KM**

16.06.2015.

Narodna Republika Kina uporno pokušava ekonomske odnose sa zemljama centralne i istočne Evrope...



**PKKS 18. juna organizuje prezentaciju firme PBS Brno**

15.06.2015.

Privredna komora Kantona Sarajevo (PKKS) organizirat će u četvrtak 18. juna 2015. godine u 10.00...

